

# kerjaya

# Berazam miliki hospital haiwan sendiri

→ Bukan mudah merawat ‘pesakit’ yang tidak boleh bercakap

Oleh Mohd Khairul Anam Md Khairudin  
khairul.anam@bh.com.my

■ Kuala Lumpur

**P**rofesional sebagai doktor haiwan atau veterinar memiliki keistimewaan tersendiri dan menggalas tanggungjawab mencabar apatah lagi perlu merawat masalah kesihatan makhluk yang tidak boleh bercakap mahupun berkomunikasi.

Kekangan itu tidak sekali-kali mematahkan semangat Dr Ismasyahir Abdul Razak, 30, untuk menerokai kerjaya diminati lebih-lebih lagi kecintaan tinggi terhadap haiwan seperti kucing.

Graduan Doktor Perubatan Veterinar Universiti Putra Malaysia (UPM) itu berkata, tidak terlintas di benak fikirannya untuk memiliki kerjaya sedemikian memandangkan minat awalnya lebih cenderung kepada bidang perubatan manusia.

“Pada mula dapat tahu terpilih mengikuti program ini memang sedikit terkejut kerana jurusan ini

adalah pilihan keempat pada permohonan Bahagian Pengurusan Kemasukan Pelajar (UPU) tetapi lama kelamaan saya rasa seronok apabila didedahkan dengan ilmu mengenai haiwan secara meluas, termasuk prosedur perubatan yang perlu dijalankan.

“Saya difahamkan ketika belajar (2007) tidak banyak universiti menawarkan kursus ini dan jumlah pelajar tidak ramai anggaran 50 hingga 60 orang sahaja, malah menariknya selepas bergraduasi, kami boleh memilih sendiri penempatan untuk bekerja,” katanya kepada BH Varsiti.

Anak kelahiran Kuantan, Pahang itu mengakui permintaan tinggi terhadap keperluan kesihatan haiwan kini mendorong pencinta haiwan mengeluarkan belanja besar demi memastikan haiwan kesayangan mereka mendapat penjagaan sempurna.

#### Perkhidmatan terbaik

Dr Ismasyahir yang kini berkhidmat di sebuah Klinik Veterinar Taqwa, Setia Alam, berkata beliau sentiasa mengutamakan kehendak pelanggan dan memberikan perkhidmatan terbaik, termasuk penerangan berhubung kaedah pemakanan serta penjagaan haiwan dengan betul.

“Berbeza dengan manusia, haiwan ialah makhluk yang tidak boleh bercakap khususnya ketika mengalami kesakitan atau kecederaan, justeru kami (veterinar) perlu sentiasa bersedia menyelamatkan



mereka termasuk memberikan rawatan bersesuaian.

“Bagi saya aspek komunikasi penting kerana cabaran dihadapi bukan setakat berhadapan dengan masalah haiwan tetapi dengan pelanggan itsendiri, oleh itu saya akan pastikan setiap penerangan disampaikan jelas, terutama membabitkan proses perubatan yang dijalankan,” katanya.

Beliau yang pernah berkhidmat di Hospital Veterinar Universiti (UVH), UPM, bersyukur kerana isteri, Nur Syahidah Jamaludin, 30, amat memahami kerjaya diceburinya, bahkan sentiasa berada di sisi tatkala masa

susah mahupun senang.

“Pengalaman bekerja sebelum ini banyak membantu saya memataangkan diri menjadi lebih baik, malah menjadi suatu kepuasan pada diri apabila pelanggan menghargai tugas dan amanah digalas menerusi maklum balas

positif yang diterima.

“Perjalanan saya dalam kerjaya ini masih jauh kerana banyak lagi impian yang mahu direalisasikan antaranya berazam memiliki hospital haiwan sendiri yang dilengkapi dengan pelbagai kemudahan canggih serta moden” katanya.

**Dr Ismasyahir sentiasa**  
memastikan haiwan yang dikendali menerima rawatan kesihatan terbaik dan bersesuaian.